

桃源縣志

北 279.211
30
+



魏鳳鼎志

光緒十六年續
修本齋藏版

重修桃源縣志序

桃源舊志初始於前明嘉靖年萬曆中重爲補葺鼎革之交簡編放軼矣順治康熙間父老感懷舊事將摺撫之而滇藩蠢動適衝其阨不果居有頃邊關晏閉文教適昌邑先達羅紫蘿侍御始據李彪白鈔本粗裒成帙縣令陳涵虛踵武增輯仍由侍御秉其成當是時是編不絕如帶蓋亦危矣越二十餘年天都汪鳳麓來尹是邦侍御方賦閒居汪君比之歸然靈光敦請復修然後殿最錙銖去留毫芒校讎視前志加密焉嗣四十餘年夔門王瞿竇懼其久將就湮有孤涵虛鳳麓兩前令初心而侍御則悠然長往矣文孝廉曉峯起膺其責孤詣宏裁與侍御後先頡頏而是編乃燦然大備烏虜其亦禮樂中之聃宏也乎自時厥後文君卽世繼起無聞單文賸義胥飽蠹魚幸譚君復園

桃源縣志

卷之首

作宰於七八十年後毅然以起衰爲己任遠覽周咨舉廢續絕時則道光元年也凡夫義烈閎章清芬遠韻賴以不墜則譚君修明之力爲尤偉又四十餘年後繼譚志者爲楚北羅子模而沙大令午峯揚廣文鈍田實左右之無如粵逆披猖之餘劫甚秦火而羅君起事無幾亦匆遽解組去故成書上之大吏未盡滿志焉夫輿圖廣狹戶口盛衰與夫城郭關隘學校隄防之沿革變遷胥邑志乎是賴今距羅君又近三十寒暑矣天運人事日新月異紀載缺如後將焉稽良棟承乏斯察凡新治舊制義學建育嬰堂規復桃溪書院前後五六年間有關民瘼靡不捐廉振興矧志乘尤吏治之金鑑敢聽其殘缺廢墜而不知兢兢耶爰聘武陵劉采九太史總持鉛槧復佐以都人士之旁搜博采不期年而藏其事書凡十二門計十六本後之任此者識民

情之趨捨考政治之得失緩急有於是任倘藉是而底爲循良
躋邑民於福林而匡余聽視所不逮良棟不佞竊拱而俟之時
光緒十八年歲次壬辰嘉平月既望

欽加四品銜賞戴花翎知桃源縣事蜀東余良棟芹塘氏撰

桃源縣志

卷之首

序一

二

序二

先儒有言莫爲之前雖美而不彰莫爲之後雖盛而不傳凡事類然而於志乘爲尤切今之郡縣有志卽周官小史所掌邦國之志也至班氏爲十志而地理居其一范蔚宗改名郡國實與地理無殊唐元和郡縣志宋元豐九域志皆專志地理樂氏太平寰宇記乃及人物藝文於是記錄詳而體例備矣夫疆域山川歷久不免遷變風土人物逾時亦有轉移其沿革不本舊聞則無所据其興衰不加纂輯則多所遺桃邑之有志自前明萬曆時創修以來迄道光辛巳譚篋園大令修之始變其例總爲四門其法非不簡約惟子目太繁稽考頗煩繙閱同治己巳續修仍其舊其書未盡善亟待訂正也余君芹塘明府蒞任數載百廢具興復念邑志未修非所以備典章而資考鏡爰集士紳

桃源縣志

卷之首

序二

籌議徧加採訪迺聘予同年劉君采九觀察爲總纂觀察時方主講朗江以其暇來此編集繁者刪之譌者正之舛鄙者潤色之彼夫炫奇而爲詰屈之詞飾美而徇唯阿之俗騁辯駁或失之臆斷矜宏博或誤於傳聞考訂未嘗折衷名實致不相副烏足以信今傳後哉茲志蓋有以斟酌之矣抑更有說焉邑之有志非徒以供省觀也將使司牧者察其山川關隘而籌所以隄防核其戶口物產而謀所以生聚見其節義人才而思所以鼓勵培養綜其壇廟秩祀而求所以崇奉馨香成民而致力於神胥於是乎在其關係豈淺渺哉至甲科稱盛於先朝藝文擅場於往哲鄉賢之遺型具在詩書之流澤常存爲士者尤當景仰芳徽砥礪名節維持風化練達才猷而處爲閭里共式之品出爲

國家大用之才卽以興起人文增輝志乘所謂名顯當世者有先
達爲之前光照後世者有後進爲之後於邑人有厚望焉恩燦
司鐸此邦瞬及六載自慚謏陋無補涓埃深幸邑志之續成爲
文物振興之象不禁鼓舞歡忻謹抒管見而爲之序

欽加五品銜揀選知縣湖南常德府桃源縣教諭謝恩燦鏡菴撰

序

凡邑志之修明關乎運會或遲至數十年以後甚或遲至百餘年而始一舉行非守土者鞅掌簿書絕不留心於志乘則皆世變爲之也明萬厯以前舊志無復有存焉者江祿蘿闕褐公諸君子皆良史才非不能出其所學以續遺薪乃流寇煽亂湖湘沅澧一帶皆爲戎馬之場當是時烽火殷天鼓聲動地文人學士皆避寇山中雖欲從事鉛槧得乎及我

朝定鼎以來又以吳藩之變軍書絡繹邑境適當其衝令斯土者奔走供億之不暇尙何暇商訂志書哉迨康熙中肅清滇境桃之民始得安輯其室家邑先達羅紫蘿侍御乃纂集舊聞網羅佚事雄筆高蹈以成前賢未竟之功邑大夫橋李陳公銳意主修亦似有不容稍緩者此邑志之所由權輿也迨其後一修再

桃源縣志

卷之首

序三

修皆侍御苦心編緝終始其間迄二十年始臻完密志成侍御亦旋歸道山深慮遺文之零落塵緒茫茫不可復振乃又有曉峯文君繼起於雍正年間續修志書兩公先後相望抱殘守缺著爲一代鴻篇而邑令又樂成其事運會所值豈偶然哉嗣是百餘年人民安堵烽燧不驚賢令君持檄仙源駐馬徘徊江山如畫人事代新未聞有起而興修縣志者承平日久此事猶難於創始而一聽其廢弛有心者不能無世道之憂道光元年滇西譚箕園泣茲土毅然以振興廢墜爲己任尅期纂集舊志重新一若名山石室之藏造物特畱以有待而於譚君一洩其菁華前邑令羅子模踵事增修相距僅二十餘年體例規模有譚志以爲之先導故其事易於觀成也今距羅君修志之時又二十餘年矣官與紳屢議修復未果行而蜀東余芹塘令獨捐

廉以成善舉屬予爲之纂定遺編予旣慕桃源山水之靈奧命
棹往遊尤樂觀其政績之賢勞民風之淳樸足以臻上考而騰
頌聲運會亦於是乎有轉機也志乘之修殆猶劍首之一快也
夫書成因爲之序

賜進士出身翰林院庶吉士 國史館協修二品銜前雲南補用道
武陵劉鳳苞采九氏撰

原修姓氏并序

明萬曆初年纂修

天啟三年補刻 姓氏序跋俱無考

國朝

李彪白抄本

康熙四年乙巳

主修 知縣陳洪範

纂輯 邑人羅人琮

序一

修桃源縣志書成蓋屬草者紳羅君人琮省成者令陳君洪範也剗剗既竣俾掌故呈書示余且請為序余讀既卒業作而歎曰令若紳豈不誠賢乎哉夫禹貢不傳則九州之土宜不辨周

桃源縣志

卷之首

原序

禮不紀則六官之職守不明是以周衰諸侯皆去柱下之籍漢興賢相先收秦府之圖志之所係若是其重也今桃邑當干戈爛漫之餘百度彫殘之日戶口之流亡未集賦稅之冗雜未清而首以稽古為事俾一邑之文獻斐然皆得以考其源流徵其興廢豈不為知先務哉夫縣之有志譬之琴奕之譜善為二藝者得心應手固不盡由於譜然而循繩引墨非譜無以致其工為縣者時勢異宜先後異績亦不能盡合於志而志之所載人物賢愚之跡禮俗豐儉之因民物損益之端文質盛衰之故可以觀而得其大概之所存前有作者固可為來茲之法戒後有作者亦不能外先哲之典型則斯志也烏可以已余蓋有志於闡郡之志矣緣師旅煩興日不遑給是為閣筆而兩君勤勤茲舉誠有先獲我心者抑余因是而感焉桃源舊屬武陵其以是

得名縣也以避秦人傳也余嘗以使輅之暇造其幽邃如淵明所記者亦屢喧遊人之屐矣卽所云田池雞犬縣令今得問其肥瘠驗其稔歉而籍征之矣使再有苛政深山絕壁更在何處復得飄然以去也然則爲治於斯者顧名思義可以瞿然深省哉與其使吾民避而疑仙以長子孫付漢晉於不知何如使吾民還而爲氓以長子孫歌帝力之何有歟近悅遠來夫子所以詔楚吏也吾亦欲舉以告今之爲楚吏者因序志而及之分巡湖北道湖廣布政司參議兼按察司副使延陵陳士本撰

序二

天下固有一事焉置之若以爲迂闊而遠於事情存之則輒重而有裨於政治者邑之有志是也昔孔子雖從周而文必監於二代又每於夏殷之禮致感於文獻之不足非獨儒者今人與

桃源縣志

卷之首

原序

二

居古人與稽以是徵宏雅也惟夫吏治之得失風俗之涓滴人物之臧否禮樂之興廢或數十年而一變或百年而一變前有爲傳後有爲繼則志之所爲不可緩也桃源故屬武陵其得今名則以淵明記漁人事始謂之仙邑創爲志者遠不可考已自萬歷年間修志後遂絕筆物之將衰也必先槁其華國之將衰也必先毀其制豈不信夫

皇清興

二十餘載事之從新者多矣未有奮牘而書者况值兵燹頻仍瘡痍未蘇咨歎未息雖郡乘亦闕焉而茂宰樵李陳君獨能勤於是舉其用意深遠視夫沾沾以簿書期會爲能盡職者何啻登泰岱而俯培塿汎溟渤而笑培井哉然非獨邑令之賢也聞羅君紫蘿氏實司鉛槧羅君以辛丑名進士受銓注歸讀書山中二酉之藏搜摭幾盡是爲摺拾遺文包羅散佚以成茲不

朽業而令君獲之若瓊寶在抱不肯讓人亦不欲掩其光怪遂付之梓天之將興斯文歟何紳與令有磁鍼之應水乳之合也由此而知令之虛已從人其相與以成善治也有如此志矣志中詩歌起自馬伏波記傳起自陶靖節代有名人讀之若披雲霞展縟飾具子驥之懷抱者雖微問津恍已置身桃花間矣喜書數語以繫其後

賜進士出身湖廣常德府推官淮南潘滋樹佑人氏題

序三

文學而切於吏治者非郡邑之志歟其山川險易足以規登涉之憂喜卽以規政事之得失矣若夫人物臧否古今懲勸之所寓也農田水利戶口賦役其興革繁簡又司牧者之鑒視存焉歷代統一區宇必命史氏參訂方輿以垂示宏業而邑志實基

桃源縣志

卷之首

原序

三

其始分之而各志其志然後合之而統一其志志之關於吏治詎不重歟楚桃夙號仙邑古人望此以避世乃余自

今上癸卯冬來令茲土值二十年鋒鏑之餘尙有遠近之遺孽未淨此儻之寤愾盈途一切奇勝靈幻之迹觸目俱成愁境不踰年而邀

朝廷之福耆定永清又賴上臺指誨治術緩賦均徭舉二十年莢楚之歌漸成鴻飛百堵向之觸目成愁者又覺奇勝靈幻種種桑麻鷄犬之色復堪動人欣慕矣夫同此山川而憂喜頓易則存名徵實凡耳目所不能周甯得不求之記載况乎臧否勸懲興革繁簡非稽諸典故烏得云師心自用暗合古人也余簿書叢沓中恒留心以購遺志而故家遺俗淪亡殆盡求諸野老亦鮮有存焉者忽一日訪之紫蘿先生如在孔壁中間金石絲竹

響出其頻年遷徙往來所懷抱不釋之鈔志而共商剗削余深
幸得所鑿視以副余不敢師心之志乃猶以吏事濡遲未遽付
梓會上臺以西事旣平勤修文獻檄行全楚而桃以夙稱仙邑
多奇勝靈幻之故尤孜孜下詢遂毅然鳩工與紫蘿氏共相竟
業要其旁搜博採斟酌損益則盡屬紫蘿氏之功余不敢攘竊
惟是案牘紛繁中恒存此以自鏡則所謂吏治文學以相關誠
區區素志云耳書成爰敬爲之序知縣樵李陳洪範題

序四

郡邑莫不有志蓋昉於班固之志地理所以總覽前聞徵信當
代也明成化中詔儒臣纂修一統志囊括稱盛然皆於郡自爲
紀邑自爲載者取之郡主合邑主專合主簡專主詳惟專且詳
張本具矣故邑志尤重若乃合計天下之邑山川人物有平奇

桃源縣志

卷之首

原序

四

多寡之不同邑亦因之以分甲乙焉而鋪張塗飾之弊起後之
覽者循文考實什一不符則妄什二三不符則愈妄誰操寸管
將所爲直道良史古人真不相及歟余邑舊志成於萬厯初年
其後無所記識又兵燹遞加天啟三年補刻復多殘缺儻殘缺
僅存之帙終不可保必使高人尋幽訪勝博士稽蹟覈名輶軒
觀風問俗循良察吏完善罔弗望洋而歎勸懲無所著觀感無
所由吾黨之責其何能辭余假旋逾年閉戶冥搜抱膝孤吟念
此耿耿用是經營舊志條其錯亂補其散失去其繁蕪訂其差
譌添載數十年之逸事哀集古今名人之詩文旁搜遠覽僅乃
成書至於山川靈幻古今豔稱人物瑰奇譚言色起標蹟必備
嘉善弗阿匪敢貽譏庶幾近實適會邑侯陳公涵虛銳意振興
百廢漸舉爰徵文獻捐俸付梓遂稱美觀

本朝幅員加廣遠過勝國文教宣訖霞布雲蒸必將表統御之盛擴
明志所未及石渠天祿之間濟濟皇皇土壤細流誰無同心又
甯獨余輩念此耿耿已哉邑人羅人琮紫蘿氏題於最古園
康熙二十四年乙丑

主修 知縣汪 虬

纂修 邑人羅人琮

同修 邑人羅天_經緯

序一

夏后正域輒有禹貢周官辨土用載職方帝王遞興紀載不一
要皆考正疆索刊定圖籍所以奠中邦而大一統也然九州異
宜四方殊尚志誌風土端自郡縣始我

朝白

桃源縣志

卷之首

原序

五

世祖章皇帝定鼎以來東西漸被南朔暨訖幅員之廣前代莫之與
京順治中業 命天下郡邑纂修志書及我

上嗣統梯航之俗盡入版圖鞅譯之區咸歸正朔於是

申命天下郡邑搜集勝國逸事以備合志一統之資時余備員楚屬

之桃源督修之檄屢下而遲遲未及竣事者緣楚南地當偏隅
國初歸誠既後中間又爲尉佗逆命盤踞歷年兵燹府加文獻

或而詢之故老訪之傳聞又百不得什一紫蘿先生邑博雅

君子也烽煙搶攘之餘獨抱孤懷與前令陳君共修縣志藏之
深山僭亂削平陵谷遷改而此冊巋然如靈光獨存於是出諸

枕秘抄授一冊因與刪繁訂要考信闕疑殘缺者補失次者序

舉凡建置之沿革時政之得失土田之墾蕪戶口之凋聚以及

習尚淳漓人物盛衰靡不開卷瞭然而治之有關於吏治者具

矣他如孝子順孫義夫節婦名宦鄉賢縑流羽士有善必錄無
微弗著而志之有關於風教者具矣若夫山川名勝所在都有
而最著者無過秦人一洞自魏晉以下遊屐屢喧故名人韻士
題詠尤多於是詩歌自伏波以下傳記自靖節以下悉採入志
中以資輶軒問俗之奇而志之有裨於登涉者具矣至於訪求
典故搜輯遺聞折衷前疑潤色時義則羅君紫蘿實司鉛槧余
不敏僅考其成而已抑余猶有說焉方今

聖天子留心民瘼凡各上憲加意撫綏宜栴民家可給而戶可封乃
瘡痍猶未卽起者何也蓋桃本荒僻加以蹂躪譬之疴羸病廢
之人元氣殆盡善爲醫者不必投以參苓但優游饜飫以養其
腸胃則民氣可得而調矣若復攻之以鍼灸投之以砒礪吾恐
治之愈急而病將日益深而不可救藥休養生息之道是在官

桃源縣志

卷之首

原序

六

茲土者優游而饜飫之桃民其庶有瘳乎因志成授梓敬述數
言於簡端用是自矢且以遺諸後賢云

賜進士出身知桃源縣事天都汪虬鳳麓氏撰

序二

志異史而與史並列蓋始於禹貢詳於周禮班固以下遞相祖
述郡邑之志卽職方所掌也史記事明是非定賞罰志則記其
沿革疆域山川古蹟財賦土俗治亂災祥政績人物節孝文章
雖專稱志史之道實式備之操筆者苟輕其事踳駁牴牾譎舛
挂漏使覽者遺憾其何以觀焉桃彈丸邑耳爲避秦故處頗多
名勝海內艷慕邑乘視他屬爲重 國初兵燹頻仍萬曆初年
所編存者什僅一二余旁搜遠覽蒐集往略添續遺踪訂正差
錯改易詭雜衆條畢舉一目瞭然會邑侯陳君授梓遂成完書

謬爲遠近嘉許復值滇逆之變原板灰燼今

皇上治定功成振興文教命儒臣纂修一統志爰徵直省通志下索郡縣僅以鈔本應檄魯魚亥豕脫誤頗多頃當事留意獻典檄催增修邑侯汪君鳳麓見訪於余余固謝絕一切幾於草木忘情筆墨之務自關夙緣况係舊纂尤無容辭於是更加損益斟酌見聞繼著二十年內所未備汪君復以長才邃學重加校訂仍爲四卷捐費選工數月卒業此蓋興舉廢墜得於政通人和之餘至於保殘守缺討論潤色之未盡誰司鉛槧余媿甚抑余嘗有志勝國之史矣覽季世諸野乘及通紀廣彙紀等書揆所耳目合之何論其間比擬非倫毀譽失真彼此易事前後鮮據往往有之豈非徇朋黨之意挾愛惜之私憑譽墓之虛文信傳聞之臆說乎推之往代所稱董狐良史洵難其人彈丸雖小載

桃源縣志

卷之首

原序

七

籍匪輕居今監古眞贗直枉之辨能勿凜然

賜進士原任四川道監察御史邑人羅人琮紫蘿甫題於最古園之

涉趣亭

雍正七年己酉

主修 知縣王良弼

纂修 邑人文 曙

同修 邑人羅天緒

同修 邑人熊逢吉

序一

粵自太史氏參訂方輿昭示宏業其紀載形勝風土人物文章諸所覈實大都自郡邑始邑乘之由來舊矣然必前有爲傳後有爲繼文獻乃不大至於有缺我

國家運應龍飛奄有中外創業垂統奠麗河山迄我
聖祖仁皇帝天亶神靈垂裳六十餘年久道化成風醇俗美其仁育義
正之普被已自浹髓淪肌矣欽逢我

皇上續承

大統紹述休明舉凡文物典章自 會典條教以迄圖書律例諸籍
靡不親加釐定悉求盡善爲萬世楷模又復

申命各省大吏纂修通志以臻車書統備之盛由是所隸州縣亦各
搜羅載籍以俟合參在邑乘之維繫誠非淺鮮也桃源爲常郡
屬邑原隸武陵自有避秦紀事遂易今名且爲海內艷慕其形
勝風土人物文章歷傳未嘗無志乃兵燹之後杳矣無徵賴紫
蘿氏與前司牧陳汪兩公先後纂輯集成卷帙而桃源邑乘仍
獲秩然可觀矣但其舉事一在乙巳之歲一在乙丑之紀其去

桃源縣志

卷之首

原序

八

今則又六十餘年與四十餘年之前事中間豈無缺置及應需
增續以待繼起之搜求討論者適士紳文君曉峯邑中之通儒
也憑其素抱蘊積不憚夫續修之舉且毅然以爲己任因與其
同志宿學熊君怡雲羅君慎菴搜輯遺聞折衷考較將有成局
就商於余余方以試用之命甫縮半通民事勞役不遑日昃於
此中探索之功尙須有待而文君等已勤勤是舉此誠先獲我
心者矣抑余尤有說焉邑乘者吏治風教之所觀成也有不刊
之書必先有不磨之績余旣忝牧茲土其間之山川古蹟與夫
農田水利戶口賦役士習民風以及忠孝節義所稱形勝風土
人物文章者自必精詳畢達推類盡神務期治與時宜民安事
易頑廉懦立毋忝先勞上可以端簡拜颺恭副

聖天子留心民瘼之盛德下藉以觀型撫字得效良有司咸熙庶績